



Inatsisartuni ilaasortaq,
Iddimangiiu Bianco,
Inuit Ataqatigiit
Maani/

§ 37 naapertorlugu apeqquteqaammut nr. 29/2026 tunngasumut akissut

Inatsisartut suleriaasissaanni § 37-mi imm. 1 naapertorlugu apeqqutinik Naalakkersuisunut nassiussaqaarsimavutit CVR pillugu. Apeqqutitit uanga suliassaqaarfisannut akisassanngortinneqaarsimapput.

Aallaqqaasiullugu CVR-imut (Det Centrale Virksomhedsregister/Qitiusumik Suliffeqarfimmut Nalunaarsuiffimmi) oqartussaaffik Inuussutissarsiornermut, Aatsitassanut, Nukissiuutinut, Inatsisit atuutsinnerannut Naligiissitaanermullu Naalakkersuisoqarfiup ataaniinnera oqaatigineqassaaq.

Aningaasaqarnermut Akileraartarnermullu Naalakkersuisoqarfiup tamassuminnga nalunaarsuineq ilitsersuinerlu suliassarai. Suliassaq taanna ulluinnarni Akileraartarnermut Aqutsisoqarfimmi isumagineqartarpoq. Taamaalilluni Akileraartarnermut Aqutsisoqarfiup nittartakkakut quppernerani innuttaasut CVR-imut nalunaarsornissaannut periarfissaqarpoq. Taamaammatt apeqqut 1-ip akineqarnissaanut Akileraartarnermut Aqutsisoqarfik ilanngussaqaarsimavoq.

Apeqqut 2-mut akissummut tunngatillugu Ineqarnermut, Attaveqarnermut Isorliunerusunullu Naalakkersuisoqarfimmit ilanngussassamik pissarsisoqarpoq.

1. Aalisartut CVR normutaarnissaminnut iluatitsisimangitsut qanoq pilersaaruteqarfigineqarpat?

Ad 1) Qitiusumik suliffeqarfimmut nalunaarsuiffimmut nalunaarsortarneq pillugu Inatsisartut inatsisaat ulloq 1. januar 2018-imi atuutilerpoq, taamaammallu namminersorlutik inuussutissarsiortut ulloq 1. januar 2018-imilli nalunaarsornissamut pisussaataapput. Aalisarneq pillugu Inatsisartut inatsisaat ulloq 1. januar 2025 atuutilersumi taamaalilluni inatsit atuutereersoq malinneqarpoq. Inatsimmi § 9, imm. 5 malillugu inuussutissarsiutigalugu aalisarsinnaanermut akuersissummik pissarsinissami, CVR-imut nalunaarsorsimanissaq piumasaqaataavoq.

Tamanna tunuliaqutaralugu Akileraartarnermut Aqutsisoqarfik suliniutinik tulliuuttunik aallartitsivoq:

- CVR aqputigalugu suliffeqarfimmik nutaamik nalunaarsornissamut quppernermik paasissutissiivimmik pilersitsineq.
- Suliffeqarfimmik pilersitsinissamut kalaallisut danskisullu sukumiisumik ilitsersuummik suliaqarneq. Ilitsersuut tamanit takuneqarsinnaavoq.
- Ilapittuutaasumik Facebookikkut paasissutissiissut nuna tamakkerlugu takuneqarsinnaasoq.
- Namminersorlutik inuussutissarsiortunut Akileraartarnermut Aqutsisoqarfimmut saaffiginnittunut oqarasuaatikkut ilitsersuineq.

- Aalisarnermut inatsisip atuutilersinneqarneranut atatillugu 2025-p ukiaanerani CVR-imut nalunaarsuineq pillugu immikkut paasisitsiniaasoqarpoq.

Inuup allap qitiusumik suliffeqarfinnut nalunaarsuiffimmi nalunaarsuinissaanut piginnaatitsissummik tunniussisoqarsinnaavoq. Taamaammat namminersorluni inuussutissarsiortoq kukkunersuisunit, eqqartuussissuserisunit akuusunilluunniit allanit assersutigalugu inuussutissarsiordermut siunnersortinit imaluunniit KONFIFA-mit nalunaarsuinissamat ikiorserneqarsinnaavoq.

CVR-imi nalunaarsuineq sumilu ikiorneqarsinnaaneq pillugit paasisitsiniaanerit 2025-mi aasamiit ingerlanneqarput 2026-milu ukiukkut ingerlateqqinneqassallutik. Aalisarnermut, Piniarnermut, Nunalerinnermut Imminullu Pilersornermut Naalakkersuisoqarfik aalisartut qanoq amerlatigisut CVR-imik amigaateqarnerisut aamma Kalaallit Nunaanni sumiiffinni suni tamanna amigaataanersoq paasisaqarpat, 2027-mut aalisarsinnaanermut akuersissutinik qinnuteqarnissamat piffissarititap tungaanut paasisat tunngavigalugit naleqqussaanerit ilanngullugit paasisitsiniaaneq nanginneqassasoq ilimagineqarpoq.

2. Attaveqaatit arriippallaarneri peqquataallutik iluatsinneq ajulertut iliuseqarfiginarneqarpat?

Ad 2) Internetikkut attaveqaat pillugu apeqqut Ineqarnermut, Attaveqarnermut Isorliunerusunullu Naalakkersuisoqarfimmit oqartussaaffigineqarpoq. Akissuteqarnissamat naalakkersuisoqarfimmit taaneqartumit ilanngussassamik pissarsisoqarpoq, taakkulu ima paasissutissiippat:

"Apeqquteqartup tunngavilersuutimini Tasiilami eqqaanilu internetikkut attaviit kigaannerat innersuussutigaa. Ineqarnermut, Attaveqarnermut Isorliunerusunullu Naalakkersuisoqarfiup Tasiilami eqqaanilu internetikkut attaviup illoqarfinni nunaqarfinnilu səkabelikkut attaveqartunisulli pitsaatiginninnera ilisimaaraa. Tusass A/S piffinni satellitikkut attaveqartuni nalunaarasuartaatikkut attaveqarnermik pitsanngorsaaniarluni suliaqarpoq. Suliffeqarfik Satellitikkut ingerlatsisumik OneWebimik naammassinnissinnaassuseq pillugu isumaqatigiissuteqarpoq, tassanilu piffinni satellitikkut attaveqarfinni naammassinnissinnaassutsimik annertusaaneq, taamaalillunilu attaveqaatinik pitsanngorsaaneq annertusarneqartussaavoq. OneWeb aqutigalugu attaveqarnermik tigooqqaanermut attavilersuutit pisariaqartut Tusass-imit ikkussoreerpata atuutilersereerpatalu atuisut pitsannguisoqarneranik misigisaqassasut ilimagineqarpoq. Tusass A/S malillugu atuutilersitsinissamat pilersaarummut missingiut atuutilersinneqarpat attaveqaat Ittoqqortoormiini Tasiilamilu 15. december 2025 aamma Qaanaami Savissivimmilu 1. august 2026 atorneqarsinnaalissaaq."

Naalakkersuisoqarfiup akissutaa tunngavigaara, maannakkullu tassunga tunngasumik ilassutissaqarnanga.

Inussiarnersumik inuulluaqqusillunga


Peter Borg

Aalisarnermut, Piniarnermut, Nunalerinnermut Imminullu Pilersornermut Naalakkersuisoq